

Nunatta Katersugaasiviata nukittorsarnissaa ullutsinnullu naleqquttumik toqqorsiveqalernissaq siunertaralugu, toqqorsivimmik sanaartornissamut pilersaarummik (projektering) aningaasaliinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarussiaq naamassereerluni UKA2023-mi Inatsisartunut saqqummiunneqassaaq.
(Inatsisartunut ilaasortaq Doris J. Jensen, Siumut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Nunatta Katersugaasiviata nukittorsarnissaa ullutsinnullu naleqquttumik toqqorsiveqalernissaq siunertaralugu toqqorsivimmik sanaartornissamut pilersaarummik (projektering) aningaasaliinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut, taannalu naamassereerluni UKA2023-mi Inatsisartunut saqqummiunneqassaaq. Saqqummiussisoq Naalakkersuisut sinnerlugit qutsavigaara.

Kulturikkut kingornussatta isumannaatsumik qulakkeernissaata pingaaruteqarnera pillugu Naalakkersuisuni siunnersuuteqartoq isumaqataaffigaarput, tassungalu tunngatillugu Nunatta Katersugaasivia Allagaateqarfialu qitiusumik inissisimavoq.

Nunatta Katersugaasivia Allagaateqarfialu Kalaallit Nunaata oqaluttuarisaanerani tamanit kulturikkut oqaluttuarisaanermi aammalu inuit kulturiinut tunngatillugit takussutissat eqqumiitsuliallu isumagineranni toqqortarinerannilu nunatsinni qitiusumik inissisimavoq. Nunatta Katersugaasivia Allagaateqarfialu katersai maanna katersugaasiviup illuutaanni assigiinngitsuni toqqorsivinni toqqortarineqarput. Illut pineqartut annertunerusumik nunasiataanerup nalaani sanaartorneqarsimapput, inillu silaannaat aqqissuusaanerallu eqqarsaatigalugit toqqorsivittut tulluaratik.

Maanna toqqorsiviit unammillernartoqartut Naalakkersuisut arajutsisimangilaat, taamaammallu 2021-mi Nunatta Katersugaasivia Allagaateqarfialu illuutai pillugit immikkoortumut pilersaarusiulersimallutik. Immikkoortumut pilersaarut ilaatigut

- Nunatta Katersugaasivia Allagaateqarfialu suliai suliarisartagaallu tamakkiisumik isigisinaanissaa paasisaqarfiginissaalu qulakkiissavaa, aammalu
- Piffissaq ungasinnerusoq eqqarsaatigalugu Nunatta Katersugaasivia Allagaateqarfialu pillugu pilersaarummik ilusilersuissaaq aammalu illuutitigut atugassarititaasunut ineriartortitsinissamut suleriaasissamik qulakkeerinnissalluni.

Immikkoortumut pilersaarut piffissami qanittumi ungasinnerusumilu pisariaqartitat pillugit paasisaqarnermik pilersitsissaaq, taamaattumillu iluarsaassinermut sanaartornermullu aningaasanut atatillugu Naalakkersuisut pingaarnersiunerinut isummersuutitut atorneqarsinnaallutik.

Naalakkersuisuni siunnersuuteqartoq isumaqatigaarput, kulturikkut kingornussavut qulakkeernissaat pingaaruteqartut.

Naalakkersuisut imaattumik allannguutissatut siunnersuuteqarnissaq siunnersuutigaat:
*Nunatta Katersugaasiviata Allagaateqarfiatalu illuutai immikkoortumut
pilersaarusiornermi Nunatta Katersugaasiviani toqqorsiviit nutaat pilersinneqarnissaat
suliassatut pingaarnertut ilaattut inissinneqarnissaat pillugit Naalakkersuisut
pequneqarnissaat Inatsisartut aalajangiiffigisassaattut siunnersuut*